



Heilbrigðisráðuneyti
Skógarhlíð 6
105 Reykjavík

Sent á Samráðsgátt

Reykjavík, 4. mars 2021

Efni: Drög að frumvarpi til laga um breytingu á lögum nr. 65/1974 um ávana- og fíkniefni (iðnaðarhampur).

Í drögum að frumvarpi til laga um breytingu á lögum nr. 65/1974 um ávana- og fíkniefni er lagt til að veita heimild fyrir innflutning á fræjum til ræktunar á iðnaðarhampi. Samtök iðnaðarins (hér eftir „**SI eða Samtökin**“) fagna þeim breytingum sem lagðar eru til í frumvarpinu enda réttara að ræktun iðnaðarhamps falli undir lög og eftirlit með fódri, áburði og sáðvöru, undir eftirliti Matvælastofnunar en ekki undir lög um um ávana- og fíkniefni, undir eftirliti Lyfjastofnunar.

Tæpt ár er síðan að reglugerðabreyting nr. 355/2020 var birt í Stjórnartíðindum þar sem innflutningur, meðferð og varsla fræja tegundarinnar Cannabis sativa var heimilaður. Frá þeim tíma hefur innflutningur á fræjum og ræktun iðnaðarhamps verið háður undanþágu Lyfjastofnunar en hlutverk stofnunarinnar er eftirlit með innflutningi, vörslu og meðferð efna við framleiðslu lyfja. Eðlilegra er að slíkt eftirlit verði fært til Matvælastofnunar sem fer nú þegar með eftirlit með innflutningi plantna, plöntuafurða og sáðvöru. Eins og fram kemur í greinargerð með frumvarpsdrögum, og SI hafa bent ítrekað á, þá er iðnaðarhampur ekki ávana- eða fíkniefni heldur nytjaplanta.

Það er mat SI að þær breytingar sem lagðar eru til í frumvarpsdrögum um að færa heimildir, til innflutnings, skilyrði, meðferð og vörslu fræja sem frumvarpið nær til, frá heilbrigðisráðuneyti til sjávarútvegs- og landbúnaðarráðuneytis og að Matvælastofnun verði falið umsjón með innflutningi fræja, séu löngu tímabærar.

Bent er á að í frumvarpsdrögum er Matvælastofnun veitt heimild að veita undanþágu frá 1. og 2. mgr. 2. gr. laga nr. 65/1974 fyrir innflutning fræja tegundarinnar Cannabis sativa í **þeim tilgangi einum að rækta iðnaðarhamp**. Þessi heimild er sambærileg þeirri heimild sem nú er veitt Lyfjastofnun og tilgreind í reglugerð nr. 355/2020 um breytingu á reglugerð nr. 233/2001, um ávana- og fíkniefni og önnur eftirlitskyld efni. Sú heimild byggir á að veita undanþágu til innflutnings, meðferðar og vörslu fræja Cannabis sativa. Undanþágan er bundin við þau skilyrði og takmarkanir sem tilgreind eru í reglugerðinni:

- a) *að magn tetrahydrocannabinol (THC) í fræinu sé að hámarki 0,20%, sem og í þeim afurðum sem fræið kann að gefa af sér*
- b) *Að um sé að ræða yrki tegundarinnar Cannabis sativa sem tilgreint er í sameiginlegri EES-skrá yfir yrki nytjaplantna í landbúnaði sem birt er samkvæmt tilskipun 2002/53/EB, sem innleidd er í íslenskan rétt með reglugerð nr. 301/1995, um eftirlit með sáðvöru.*
- c) *Að viðkomandi fræjum fylgi gögn sem sýni fram á að um sé að ræða yrki sem sé tilgreint í sameiginlegri EES-skrá og uppfylli skilyrði tilskipunar ráðsins 2002/57/EB, um markaðssetningu olíu- og trefjaplöntufræs, sem innleidd er í íslenskan rétt með reglugerð nr. 301/1995, um eftirlit með sáðvöru.*

Samtökin hvetja til að að heimild til innflutnings fræjanna, Cannabis sativa, verði rýmkuð og nái einnig til annarrar framleiðslu en ræktunar iðnaðarhamps. Hér á landi er að finna fjölmargar



innfluttar framleiðsluvörur sem eru unnar úr sömu tegund fræja, Cannabis sativa, og ætlaðar eru til manneldis eða snyrtingar svo sem húð og hárvörur. Það skítur því skökku við að með frumvarpsdrögum sé ætlunin að heimila innflutning fræja en að sú heimild einskorðist við ræktun iðnaðarhamps en ekki til annarra framleiðslu. Eðlilegra væri að heimild til innflutnings Cannabis sativa-fræja sé óháð því **hvað** eigi að vinna eða framleiða úr fræjunum sbr. kafla um *Afurðir iðnaðarhamps* sem er að finna í greinargerð með frumvarpsdrögum en ekki þeim skilyrðum háð að sú heimild sé í **þeim tilgangi einum að rækta iðnaðarhamp** eins og fram kemur í frumvarpsdrögum.

Virðingarfyllst,

A handwritten signature in blue ink, appearing to read 'Gunnar Sigurðarson', is written over a horizontal line.

Gunnar Sigurðarson,
viðskiptastjóri á framleiðsluviði